


**TH. BARTHOLINI
RESPONSIO DE
EXPERIMENTIS
ANATOMICIS
BILSIANIS ET...**

Thomas Bartholin



3

TH. BARTHOLINI
RESPONSIO
DE
Experimentis Anatomicis
Bilsonianis
ET
Difficili Hepatis resurrectione,
AD
Clarissimum Virum
NICOLAUM ZAS.



HAFNIÆ,
Apud PETRUM HAUBOLD,
ANNO 1661.



Clarissimo Viro

D.D. NICOLAO

ZAS

Medico Roterodamensi

S. D.

TH. BARTHOLINUS.

Publicas Tuas ad me literas
 nudius tertius legi, aliena dialecto
 scriptas, forsan & mente. Mira-
 tus sum impensè litem mihi propter illum
 moveri, quem officiosa Censura in Spicile-
 gio secundo constitueram devincire, aded
 verus est *Tacitus*, plura nos sæpe peccare dum
 demeremur, quam quum offendimus. Ex
 sinistro enim tuo responso perculsus, non
 metu ullo aut ignobili timore, qui majori in-
 vidia affvevi, sed quod benè cogitata, ami-

co prorsus animo à me profecta, in deterio-
rem partem interpreteris. Scias quippe,
quem cætera perspicacem intelligo, nocen-
di à me animum abfuisse, nec unquam illius
odium aut indignationem quæsisse, quem
dato studio ad præclaros conatus pertexen-
dos porro animare sententia stetit. Aegrè
tuli quod rudius à nonnullis, ut fama fere-
bat, tractaretur, ne aculeato scribendi ge-
nere deterreretur à susceptis laboribus. Un-
de non tantum apud amicos domi data oc-
casione Nobilissimi Bilsi laudavi sæpe insti-
tutum, sed & idem ad Clarissimum D. *Blasi-
um*, dignissimum Amstelodamensis Gymna-
sii Professore per literas familiares testatus
sum. Quumq; anniversariis Disputationibus
Celeberrimorum Autorum de Lymphaticis
nostris Vasis sententias exponerem, hujus
quoq; Viri inventa nupera principibus Achi-
vis permiscui, non ut damnarem nuper natas
observationes, aut nomini Nobilissimo ma-
culam ingloriam adspargerem, sed ut veri-
tas publica ventilatione excuteretur, & ad
arcana sua Bilsius invitaretur. Nec credidi
adeò esse vos pruriente sensu, ut vel blan-
dissimo palpo irritari possetis. Supra morta-
le fastigium se evexit, qui nullius attactum
fert.

fert. Profectò si eo vos estis ingenio, rectius domi vestra servaretis. Credite mihi injurato, neminem tam fore occæcatum, ut sola nominis vestri autoritate sine accuratiori scrutinio vestra vel experimenta vel promissa sit amplexaturus. Gratis nemo cordatus invisa credit, & ut in sententiam vestram orbis eruditus concedat, scrupulis omnibus prius erit satisfaciendum, quam vel in expensorum participationem vel ad plenum applausum pertrahamur. Expendenda omnia sunt, quæ ex se natura parturit & ars efformat, & velut Aquilini pulli, ita singulorum observationes ad solis seu veritatis splendorem examinandæ, ut pro legitimis suscipiantur. Vides, mi *Zasi*, quæ mente ad *Bilsi* tui accesserim experimenta, non ut vel illius honori vel horum veritati nigrum theta præfigerem. Luscis oculis vel effascinatis Spicilegium meum secundum inspexit, cui id de me in mentem venit. Abhorret ab ingenio meo perversus aliorum mos, qui nihil rectum putant, quod ipsi nesciunt. Non mihi aut gloriæ meæ decedit, quod plus alii videant. Nec enim omnia Naturæ mysteria unius ingenium exhaurit. Plura restant etiam posteris investiganda. Non invidéo,

sed applaudo, siquidem speciosis verbis eventus respondeat. Promisi hunc *Bilfio* tuo applausum, laudemq; diligentiae aeterno nomini, & summo officio hortatus sum ne promissas demonstrationes diutius differret. Hæc summi honoris & sinceri animi verba quod sinistrorsum acceperit, non mirum, quia ex tua confessione literas humaniores ignorat. Rectè *Cajus Lucilius* olim dixit, ea quæ scriberet, neq; se ab indoctissimis, neq; à doctissimis legi velle, quod illi nihil intellexerent, hi plus fortasse quam ipse. Id tamen miror, quod Tu, Vir Doctissime, illius Patrone, acutius videns, veri interpretis officio defueris. Omnem admirationem superat, quod se supra emendationem homo protulerit, navesq; suos vel ignorare voluerit, vel dissimulare. Nimium vobis estis suffeni, vel certè Tu, mi *Zafi*, qui pro Deo *Bilsum* colis, & supra mortales errores evehis, vel adulatione nimia vel cæco in præceptorem amore nimium peccas. Quo furo induces avaritiam ipsi ex merito exprobratam, quod magno adeò precio suas Mumias divendat, unamq; solam 40000. florenis exponat licitatoribus; nec ullum, etiam artis ejusdem candidatum, ad spectaculum
breve

breve & momentarium admittat, nisi soluto prius Unciali. Sub Arcto habitamus, non-nullos tamen audiui, quos poenituit expensarum. Ideone contra me plena penna debaccharis, quod ulcus *Bilsij* sordidum tetigerim. Nobilis tuus *Bilsius* aurum ex cadaveribus & mortuorum visceribus colligat. Non ideo tamen illi Judæorum fatum optavi, de quibus *Josephus* l. 6. Belli Judaici c. 15. quosdam refert compertos, qui aurum devoraverant, & idcirco à Romanis necatos reclusis visceribus. Non læsi Nobilitatis decus, sed emendavi, sed amicè monui ne prostitueret partam nobilitatem, quum & nobis cura nobilitatis incumbat. Quamquam tanta habendi cupidine flagraret, ut propter centum sestertia in Rhenum vicinum, non cum illo in Tiberim, se mallet dare præcipitem, optarem tamen prudentiorem audaciam, saniora consilia & vitam longiorem, ut diligenti cadaverum dissectione Artem Anatomicam pro virili parte augetet. Quid deinde *Bilsianæ* invidiæ prætendes? Injurius in Deum & Naturam est, qui sibi soli servat, quod benevola Natura ex nutu Dei pluribus voluit esse commune. Occultanda Principum consilia, Dei autem

opera propalanda sunt, *Tab. XII. 8.* Quod si eâ invidiâ hactenus à primis Anatomia incunabulis Profectores suas occultassent observationes, vel Medici remedia, pejus jam cum genere humano ageretur. Ferunt Nobilem Bilsum sua filiolo secreta reservasse, non tamen prius propalanda, quam fatalem horam sibi imminere senserit. Quis verò spondebit Bilsio meditatam mortem, quis filiolo? Profer dum vales, mi *Bilsi*, dum sani vigent sensus, artes tuas & secretum operandi modum, nisi publicum erubescat, ne tecum funeretur, & migraturo hinc forsan oneri sit. Sic omnes mortales Tibi æternò beneficio obstringes, & Deo omnium bonorû datori gratus videberis. Tu qui intima apud illum es admissionis, Doctissime *Zesi*, illa consilia suggere, meliusq; de publico mereberis in famæ tuæ exordio, quam acerbis Apologiis, quibus xi quasi armata & maledica venerationem apud literatos Bilsio studes procurare, quasi hi minis terrentur, aut his eadem arma decissent pro famæ & vitæ tutela, quæ consultius contra imminentem cervicibus Christianorum Thraciam acuet quicunq; generosi pectoris incendio ardet. Non cadit in hos bonarum rerum invida suppressio, qui bonis

bonis abundant, at quibus curta domi est suppellex, arcanis eliminatis, paupertati metuunt. Invisum hoc Apollini mortalium genus, & cum rusticis Liciis plerumq; tandem in ranas coaxantes transmutantur, quod fessam Latonam ex naturæ rivulis bibere impediunt. Quo deniq; nomine excusabis Bilisium, tuum clientem, quod omnes Professores præ se contemnat, tanquam fungos, truncos & inutile lignum, quum inter illos sint fuerintq;, qui ætatem inter utilissima experimenta consumpserunt, nec ingloriam operam literariæ Reipublicæ mutuati sunt. Si ille albæ est gallinæ filius, an reliqui idcirco ex Ibide nati? Gloriæ temperantia illos decet, qui hæc sacra tractant, & prudentis est sua fortuna, sua in novis felicitate, sua deniq; arte, moderatè uti. Si parvis magna componere licet, Antisthenis illud ad *Platonem*, cætera maximum, in hos quadrat, quum equum hinnientem in pompa frementemq; vidisset, *Tu, inquit, meo iudicio præclarus fuisses equus.* Non ego me pro Professore commendo, quanquam olim in hoc studio impigre desudaverim. Sint quidam qui me dicant non fuisse Anatomicum, At qui me vendit Bibliopola putat.

Tuæ quoq; humanitati & benevolentiaæ debeo, quod Phœnicem Anatomicorum me vocaveris, Aliis Princeps dicor, aliis antesignanus, oculatissimus, felicissimus &c: Quamquam benevola Doctissimorum Virorum judicia spernenda non sint, quibus meritas ea propter gratias ago: tanti tamen nunquam meum studium putavi, ut tantos titulos mererer. Serio te loqui dubitare non ausim. Malè tamen apud Te audit Clarissimus *Pecquetus* quia clarissimum me & inter ætatis hujus Anatomicos oculatissimum appellavit, mihiq; deinde exprobras, quod eadem repetierim. Quo verò fine id à me factum, verbulo indicavi *Spicil. Vas. Lymph. I. c. 4.* non laudis prurigne, sed conscientiaæ fiducia, quam hic & alibi integram servabo, rumpatur ut ilia Momis. Quicquid sit, meo pede me didici metiri, nec ab ullo venerationem mihi emendicavi. Sunt alii in his artis operibus magis exercitati, benèq; meriti, qui protervè adeò lutulento pede conculcandi non sunt. Sit illis, qui præcesserunt, sua laus, sit sua quoq; sequuturis. Unde hauserit artis suæ fundamenta Nobilis Bilsius, ipse *Cl. Joanni van Horne* confessus est, ut ante lectam Anatomiam nostram Belgicam &

& D. *Barbette*, nec partium nomenclaturas, nec actiones noverit. Non in opprobrium Bilsii ista afferuntur, sed ut admoneatur, ne de ponte illos dejiciat à quibus artis didicit rudimenta. Neq; pudere illum debet hujus lectionis. Majores enim illo lectores habui, & magis gratos, quibus de meliore luto finxit præcordia Titan. Sed nec defuere æmuli & osiores, in meis operibus ingeniosi, clanculum tamen ex nostris lucubratiombus doctiores, ut verè dixerim cum *Theodoro Atheo*, verba me auditoribus & lectoribus dextrâ manu porrigere, illos verò nonnunquam sinistrâ accipere. Gratulor interim mihi, quod etiam *Bilsius*, tantus artifex & cadaverum conditor, nostris sit enutritus principiis, quibus deinde novas suas observationes superinduxit, & novo velo pulchriorem sponfam amasiis suis splendida dote obtulit. Infra modestiam meam est & consuetos mores, navatam in sectionibus hominum, brutorumq; operam Nobilissimi Professoris *Bilsii* extenuare. Diligentior culter quamvis laudem & inveniendi felicitas quamvis coronam meretur, modò ille innocentibus parcat. Si fides tuæ relationi, ultra 60. cadavera humana evisceravit, & præter alia

alia animafia, plus quam mille canes enecavit. Certè omnj latratu civitatem Roterodamensem despumavit, totq; canicidiis expurgavit. Utinam proprium & domesticum quoq; canem, omnium instar, jugulasset. Forſan paucioribus extispiciis idem fuiſſet aſſequutus, ſi in conſilium artis magiſtros adhibuiſſet, nimisq; ſumptibus peperciſſet. Sed hæc ad me non ſpectant. Didicit ille Anatomem ſuo modo, nos noſtro. Sufficit quod in nundinis merces ſuas venum exponat & emat ipſe, ſiquidem, ne pluribus innotescant invidia quadam nobili, ut ille putat, & neceſſaria, ſuos theſauros ſupprimat. Indefeſſo hoc ſtudio meruit Nobiliſſimus *Bilſus*, ut à nobis quoq; publicæ illius Epiſtolæ legerentur, quas amico animo, neutiquam malevolo, à me eſſe lectas amica mea in Spicilegio ſecundo pagina teſtatur. Non quidem inde doctior reſceſſi, ſed, quod apud *Comicum* eſt, incertus multo quam dudum. Temperate mihi tamen nequeo, quin curſorio oculo evolvam quicquid recentiorum calamus ſubminiſtrat, & maiorem illis gratiam referre ſoleo, qui nudam nobis Naturam ſine velo aperiunt. Nec tuo, Doctiſſime *Zaſi*, de Vaſis Lymphaticis ſeu Aqvoſis

Bel-

Belgico idiomate conscripto libello horulam denegavi, ubi binæ ex cadaveribus observationes luce dignæ mihi visæ sunt, sicut magna nominis tui laude alibi ex schediis meis intelliges. Quocunq; in me sis animo vel affectu, ne credas me vel Tibi malè velle, vel Bilsio malè precari. Offensas libenter condonabo, quas non merui, semperq; malui officiis certare quam injuriis. Et quanquam connato candore nævos recensitos notaverim, & quam molliissimâ manu tetigerim, non volui tamen incircò, ut acerbius tractaretur, quia majores in illo virtutes eluentes faciliè possent nævos vel delere vel obscurare. Eleganter *Petronius* in *Satyrico*: *Apes idèò pungunt, quia ubicunq; dulce est, ibi & acidum invenies.* Candido hoc pectore diras vestras incurri, quibus jam nihil responderem, nisi & silentii pœnas metuerem. Promptior foret ad obsequium calamus, si tam rationibus certasses, quam maledictis. De Epistola tua Apologetica, pace tua, dixerim, quod olim de lusciniâ: *Vox est, præterea nihil.* Intacta relinquis rerum momenta, & difficultates propositas, quasi non animadversas, sicco pede transilis, quas ante amoris vestri fiducia amicè attuli, quam assensum pollicerer. Opor-

portet vos otio abundare, qui tot verba gratis effusa perditis. Ego magis occupatus cum tædio ista legi, ex quibus nec doctior lector evadit, nec firmior amicitia, quam inter bonos & placidos mutuis literarum colloquiis vel augemus vel provocamus. Expectabat curiosus animus cum novo Vasorum Lymphaticorum progressu & usu, solidam distributionis chyli ad hepar demonstrationem, quam Bilsius promisit, ut hepatis ad resurrectionem aditus pateret; opinione falsus & expectatione, præter vespillonum nœnias, & Siculas gerras nihil audiavi. Nam cœco favore in hepatis auxilium ruis, & chylum illi inferis per meseraicas, quas eo cremore imbutas, nec unquam vidistis, nec reapse demonstrare potestis. Provocat tamen ad artis suæ certitudinem *Bilsius*, quam demonstraturum se pollicetur, si vel ego in Belgium, vel ille in Daniam navigaret, ideòq; me ad se invitat vel licentiam huc veniendi ab Augustissimo nostro Rege, (qui nullos à finibus Regni sui, præter Judæos, sine salvo conductu arcere solet,) me interprete exambit. Sed si me audiret, transigeret prius cum domesticis suis, suasq; artes vicinis suis Leiden-sibus commendaret, in arte secandi versatissimis,

simis, à quibus, ut fando accepi, hætenus impetrare non potuit assensum. In Anatomes peritiâ nulli, nedum mihi, cedunt, ut illis primum debellatis, qui sudes sunt in oculis, facilior deinde de me absente & remoto sit futurus triumphus. Nec animum obfirmabo, facilis ad applausum, si istis Anatomie Professoribus, præter alia, demonstraveris chyli ingressum in hepar, sed immediatum ex venis lacteis, non rubris mesentericis per longas ambages, quibus cum sanguine mixtus, chyli propriam appellationem amisit. Ubi hæc & alia quæ promittuntur, à *Bilsio* demonstrari quocunq; vel levi indicio mihi à fide dignis fuerit renunciatum, statim etiam non visis acquiescam, nec opus erit sumptus in itinere ultro citroq; perdidisse, aut *περιόδευσιν*. Quamquam verò hanc Anatomes lampada aliis jam tradiderim, & Honorarii titulo seu privilegio à Clementissima Regia Majestate concessio emeritus, hucce exercitiis amplius vacare non debeam, quæ juniori in Academia Medico solent committi, nec meæ amplius sortis negotium esset; volupe tamen fuit per discipulum olim meum, nunc successioni maturum, Virum Clarissimum D. *Henricum à-Mölnichen*,
Affi-

Affinem & amicum sincerum, tentare apud *Bilsum*, quid tantis promissis subesset. Igitur quum Möinichenius ex Italia & Gallia redux patriam meditaretur, per literas svasi ut in transitu *Bilsi* sectiones præsens inspiceret, quo certius deinde nobis de miraculorum constaret veritate, de Lymphaticorum augmento, & de hepatis salute. Paruit monitis Vir in Anatome exercitatus, tanto libentius, quod ipse quoque curiositate incredibili omnia sectaretur quæ ad artis complementum spectant. Adfuit igitur *Bilso*, & sicut testatur, humanissimè fuit exceptus, sed nihil eorum reportavit, quorum gratia illuc venerat. Si Tibi *Bilsius* tuus habitos inter, utrumque; Anatomicum sermones reticuit, non gravabor referre, ut porro hæc in memoriam illi refrices. Dies erat octavus septembris proximè elapsi anni M DC LX, quum primò inviseret *Bilsum*, quasi artis Anatomicæ ignarus, solutoque Imperiali Thalamo, nihil præter corpora balsamo condita vidit, nihil præter invectivas voces in Medicos & Anatomicos audivit. Spem verò ipsi faciebat *Bilsius* videndi corpus conditum quod sub manibus habebat post sex dies perficiendum. Möinichenius simulans sola curiositate

ositate ductum sine ulla Anatomies peritia, præfabatur officiosè, venisse se spectatum miranda illius & stupenda opera, rogareq; ut sectionem unicam in vivo cane sibi monstraret, quo oculis ipsis intueretur illa quæ ni ore omnium Batavorum versabantur. *Bilsius* ægritudinem nescio quam cœpit prætexere, & intra sola verba observationes claudere. Addidit tamen, si post dies quatuor vel sex rediret, visurum esse omnia. Hinc reversus *Möinichenius* Roterodamum die XVI. ejusdem mensis, ex domesticis *Bilsi* intellexit, post discessum primum integrum fuisse valetudine. *Bilso* verò in manus tradidit literas commendatitias amicissimi Domini *Lonnes* Amstelodami scriptas, detectaq; larva apertè se profiteri artis Anatomicæ studio addictum, & rogare, siquidem ex lectis relectisq; omnibus illius opusculis non pauca minus vera sibi occurrissent, ut vi literarum commendatitiarum, inprimis ipsius *Bilsi* ad Anatomix studiosos, promissis satisficeret non verbis sed veris demonstrationibus. *Bilsius* verbis officiosis magisq; humanis quam in primo congressu, sine ulla in Anatomicos Medicosve investiva, promisit se dubia explicaturum ex figuris veris & ac-
b cura-

euratis, quomodo satisfecerat Excellentissimo Domino Regio, nullam canis vivi dissectionem urgenti. Non contentus ista responsione *Möinichenius*, negavit motum humorum talem esse posse, qualem ipse fingit, propter valvulas in Vasis Lymphaticis frequentes. Regessit *Bilsius*; si valvulae sibi monstrari à *Möinichenio* possent in lymphaticis, fore illum solum & unicum qui naturam nosset ejusque operationes, se verò illis visis propria manu recantaturum omnia scripta & dogmata cum solenni confessione erroris sui & cœcitatatis. Instabat *Möinichenius* ut unicâ sectione tantas lites dirimeret, se statim ad suas demonstrationes fore paratum sive in eodem carne, sive alio monstraturum ad oculum valvulas & alios *Bilsi* errores. Non potuit tamen *Bilsius* sive obstinato animo sive causæ malæ metu adduci ut votis annueret. Advocaturum quidem se amicos dixit, qui sectioni Möinichenianæ testes adessent, quos *Möinichenius* admisit facilis, sed ea conditione ut *Bilsius* prior esset in demonstrando. In cassum tamen omnia tentata. Nullis enim precibus aut expostulationibus se exorari passus est, ut in præsentia *Möinichenii* vel unam solum dissectionem in se susciperet. Duorum

orum mensium inducias postulavit, quibus finitis mira promisit. Inter hos sermones supervenit *Nicolaus Stenonis* noster, discipulus quoque meus, quem sperata sectio illuc invitaverat, cum alio Medico vicino, sed irrita omnes spe discesserunt. Suggere hæc clienti tuo, ut sciat quanta spe multos, etiam publico programme invitatos inescet: & qualem inventurus sit qui in demonstrationibus conferto pede & manibus promptis cum illo congregari paratus est, si invisenda Daniae desiderio flagraverit. Inaudita ante & invisita si protulerit, inaudito applausu excipietur, meque inter primos laudum præcones numerabit. Quantum ex sparsis schedis & aliorum animadversionibus perspexi, in vero lymphatici humoris decursu à recta distributionis via aberrare est necesse, quia valvulas oculis cultroque manifestas vel negligit vel celeri manu obterit. Deinde in exsiccatis balsamoque conditis cadaveribus, quanquam artificio eleganti pateant interna vasa, valvulae tamen exsiccatae humores reciprocos invetis viis permeantes & ultro citroque sine obstaculis decurrentes admittunt.

Magnum subsidium ad œconomiam corporis, & vasorum separationem affert so-

b z

cre-

cretum Bilbianum, quo omnem corporis sanguinem, in sectione obviū & incommodum, sine ulla vel guttulæ profusione, ab una corporis parte ad alteram scit amandare, imò in hanc vel illam corporis regionem, quocunq; placuerit propellere novit. Modum sibi servat, ut soli sibi sapiat. Quamquam verò parum cruor exercitatum remoretur, præsertim si ligaturis vasa constringantur, tamen ad multos usus secretum, si quod est, & secreti authorem illustrem commendamus. Varias sistendi sanguinis rationes usus nos docuit, quas in dissectionibus cadaverum hæctenus negleximus, si interceptionem per vincula excipias. Non dubito, quin ad Anatomicas præparationes possint transferri. Sunt quæ condensent & in grumos stringant, qualia exsiccantia sunt, & emplastrum ex gypso cum alumine apud *Brasavolum* in Aph. palmam omnibus præripit Sal mirabile Clarissimi Chymici *Glaberi* "Mirac. Mund. part. 2. c. de Us. Sal. in reb. al. quod non tantum aquas quascunq; pluviales vel destillatas brevi spacio in glaciem coagulat, sed & fontem salientis aquæ obturat: vinum quoq;, acetum, cerevisiam, mel, mulsū & alios liquores in durissimam

nam glacieq; æmulam soliditatem compingit. De Sale quodam fixo observavi apud Chymicum nostrum peritissimum & amicum optimum D. *Abasverum Payngk*, aquas in gelatinæ consistentiam versas. Compescendo sanguini idem Sal sufficeret. Alia comprimendo sistunt, sicut de cribellario narrat *Rhodus* noster Cent. 1. Obs. 91. Frigus repellendo sedat hæmorrhagias, de quo disputat *Hildanus* Cent. 3. Obs. 2. damnatq; *Bennettus* Theatr. Tab. Vestib. Exerc. 26. & substituit calorem superficie tenus, vel extremarum intensum. Occulta nobis qualitate manifestos edunt effectus, *Zizania* nostrorum experientia; urtica apud *P. Borellum* Cent. 1. Obs. 91. Jaspis *Boëthio* l. 2. de Gemm. c. 102. hæmatitis *Dioscorid.* l. 5. c. 144. fuligo *Severino* Trim. Chir. c. 20. ut alia taceam manifesta, de quibus *Galen*i est judicium l. 9. de simpl. Med. Fac. quod adstringentia refrigerando, contrahendo, constringendoq; contentum in partibus sanguinem repellant. Superstitiosi verba advocant, quorum effectus etiam sine superstitione innotuerunt. Ad transferendum sanguinem follis conferret spiritu propellente, tumq; injectâ ligaturâ ex voto succederet o-

peratio. Si meliora his secreta in scriniis vestris servantur, quanquam invideret Bilius, tu tamen, *Zasi* doctissime, non suppresses, ut benè de mortalium salute merearis. Non est quod infensum clientem metuas. Arcana inter artis filios & socios cum veniâ eliminantur, & latinâ scriptione, peregrina illi Dialecto, tutus eris. Publicæ salutis privatus timor cedat. Fidem meam interpono, publicas utrumque, gratias relaturum, & à me maximas. Parcis enim veritati, quod inter inimicos Nobilissimi Bilii me recenseas, quum id unice in *Spicilegio secundo* egerim, ut hominem laudarem, & à calumniis alios absterrem. Procul habeo invidiæ causas, & malitiæ, quæ hætenus ignoravi. Nec enim mihi de plebe infima animus, aut infensa virtus. Si credimus Livio l. 35. *nulla ingenia tam prona ad invidiam sunt, quam eorum qui genus ac fortunam suam animis non æquant: quia virtutem & bonum alienum oderunt.* Quod verò assensum plenum novis illis artibus in aliam distulerim occasionem, donec clarius & ad liquidum veritas Bilianorum experimentorum explorata esset, ægrè ferre non debes. Eruditorum facta orationi illorum convenire debent, & con-

consilia ad exitum perducenda antequam probentur. Gravius nihil dicam, ne convitiis vobiscum certare videar. Inter bonos amicitia pugnandum, non injuriis, quæ nec tegunt, nec vulnerant. Semper hac in re qui vincitur, vincit. Divites opertis oculis sua bona computant, sed Anatomicus oculatis manibus fidit. Magni authoris est sententia, *nullum consilium*, addo artificium, *laudari posse, nisi peractum*. Laudavi interim conatum Bilsii, & ardens in Anatome studium, bonisq; ominibus prosequutus sum. Fertur corpora magno labore præparata & condita servare, hospitibusq; advenientibus & passim invitatis ostentare. Audio multis placere, ab aliis verò non magni fieri. Sic varia sunt hominum judicia, quibus me pro arbitro non interponam. Sinamus cum Zenone apud Romanæ Historiæ Principem, *suo quædam periculo furere*. Testatur mihi Illustrissimus Vir Dominus *Otto Kragh*, Ser. Reg. Majest. Danorum ad Præpotentes Belgii Fœderati Ordines nuper Legatus meritis-
simus, magnus Literatorum fautor, cujus subactò judicio multum tribuo, quum ad visenda miranda Bilsii opera Roterodamum concederet, à Nobili Bilsio insigni humani-

tate se exceptum, vidisse mira voluptate artificiose secta & præparata corpora, nec sine digno encomio Bilsi mihi conatus deprædicat. Cœlo imputet Bilsius, quod Principibus Viris placeat. Dignum sua generositate fecerit, si spreto sordido lucro, laudis folius amore, nostris quoque Theatris submisserit pollincta sua cadavera, ut apud Boreales famam suam factis hujusmodi extendat. Patebit tum manifestius illius artificium, & omnes nos ad laudem promeritam inveniet faciles promptosque. Dum enim absentes liberiori iudicio per absentium vagamur spectacula, facilem indignationem illorum incurrimus quibus præter laudes & acclamationes nihil placet. Sicque his illisque injurii videbimur, nobis, quod credere debeamus inviti, illis quod necessariâ incredulitate inventis deteramus partem laudis, quam forsitan integram deberemus. Balsamationem pleno ore extollunt curiosi rerum æstimatorum sine ullo partium studio, inter quos *Möinichenius* quoque noster. Negat tamen vasa & alias partes corporis balsamati, de quibus exultat *Bilsius*, ea elegantia præparatas quæ omne punctum ferret. Nihilominus, tuo iudicio, author tanti ipsam corporum

rum balsamationem non facit, quanti artificiosam cadaverum præparationem ante pollincturam. Non pateris me in *Spicilegio secundo* præferre recentiorum cadaverum demonstrationem, in quibus singulæ partes naturali colore, connexione debita, figura propria rectius videntur, quam in exsiccatis. Nec ideo artificium Bilsii extenuatur, quod sine fucō dilaudavi, nec muto factum, quanquam ea vobis de me non sit fiducia. Per commodum dico esse inventum, & famæ surgenti nobilitatiq; egregiæ dignum, in illis præsertim terrarum angulis, ubi recentia cadavera Sectoribus denegantur. At Patavii, Parisiis, Londini, Hafniæ, Leidæ, ubi superiorum indultu in nuper defunctis cadaveribus sectiones fiunt & demonstrationes publicæ, quin hybernis mensibus utiliora sint pro cultro Anatomicorum & oculis spectantium, vigentia suo succo corpora, non negaturum Te credo, hujusmodi exercitiis Academicis assvetum. Cæterum Sirio ardente, & in superstitiosa nonnullorum hominum averfatione, ubi recentia nec haberi possunt nec præparari, opportuno Bilsii artificio defectus supplebitur. Ista artificiosa præparatione, Ægyptiorum Mumias, quæ

teste *Herodoto* l. 2. Euterpe, viscerum omnium ferè extractione conditis deinde rebus implebantur, majori labore & ingenio superavit, quia dispar Ægyptiacorum & Bithyanorum corporum usus est & finis. Ne aridum sit Responsionis hujus argumentum, tuæq; simile, de istis lectorum in gratiam pauca libabo.

Complures sunt condiendorum cadaverum utilitates, quarum plerasq; Ægyptii perspexerunt, nonnullas recentiorum superaddidit curiositas. I. Ad fætorem arcendum, ut elegantissima machina putredinis deformitatem evadat, & diutius conserve-
 rur. Hoc sine Josephus ejusq; Pater Jacobus *Genes.* 50. balsamo conditi leguntur, ut in promissam terram transportarentur. II. Æternitati eo modo præluditur, spesq; resurrectionis apud superstites augetur. Rectè B. *Augustinus* l. 1. De Civ. Dei c. 12; *curatio funeris, conditio sepulturae, pompæ exsequiarum, magis sunt solatia vivorum, quam subsidia mortuorum.* III. Accedit vivorum in defunctos veneratio, quorum ut memoria, ita exuviae perpetuitati sacrantur. Æthiopum pietas laudatur, quod olim demortuos suos gypso obductos, picturaq; exornatos ad accuratam

ratam illorum effigiem, vitro indiderint, domi suæ servaverint, & solenni pompa per urbem conspiciendos circumtulervnt. Hinc ad magnates ea cadaverum cultura transiit & conditura, etiam seculo nostro usitata, quam tamen suo cadaveri denegavit gloriosæ memoriæ CHRISTIANUS IV. Augustus Danorum Rex, omni in memoriâ & veneratione dignissimus. Aliis loquatur *Seneca* l. de Tranq. An. c. I. *quid opus est seculis duratura componere? Vis Tu non id agere, nec te posteri taceant? Morti natus es: minus molestiarum habet funus tacitum.* IV. Ad civiles motus avertendos defunctorum Regum conditura subvenit, ut diutius imperio credantur præesse. Hinc apud *Saxanem* nostrum l. 5. Hist. Dan. Frothone Tertio Rege Danorum mortuo, egestis visceribus, salitum corpus triennio Proceres asservandum curabant, provinciarum defectionem vulgato Regis exitu formidantes. V. Vel in pœnam vel solatium, nonnunquam diutius à putredine incorrupta vindicantur, suæq; mortalitati cadavera supersunt, sive nativò balsamo & sale, sive sepulchrorum terræq; salinæ & nitrosæ potestate, sive alia causa supranaturali. Efodiuntur in patria nostra post multorum

anno-

annorum decursum non rarò integra corpora, quæ longiorem ætatem ferre valent. Nobilis Venstermanni exemplum adduximus, à nobis visum, *Cent. 1. Hist. Anat. Rar. 62.* Notat quoq; *Albertus Crantzius* l. 3. Metrop. c. 42. 48. Svenonem Daniæ Regem per annos LXX. integrum in sepulchro à putredine Libentii Hamburgensis Episcopi gladio fuisse conservatum, sed interposita prece Adelvardi Seonum Apostoli absolutum cecidisse in cineres. Carpentoracti anno 1642. refossum corpus femineum post aliquot secula incorruptum, describit *Theophilus Raynaudus* l. de incorr. Cadav. c. 2. quasi Bilfiano opere pollinctum. Aptè enim commissa inter se erant membra, carne sua & cute, arida tamen & subfusca, bellè vestita. Sua uberibus tamen inerat mollitudo, collo lenitas, nec non coxendicibus & posticæ pedis dextri parti planè integræ, & post scapulas insveta cadaveri teneritas, qualem quoq; in Venstermanno observavimus. Capilli capitis, cuti tenaciter adhærebant, aures integræ, lingua arida, laryngis cartilago sana & vegeta; carne & cute nudata facies, dum vi exhumatum est corpus, per imprudentiam concisa. Humor oculorum orbibus

bus continebatur, Chirurgusq; Rollerius vulnerariam bolidem capiti immiffam, humore glutinofa & obfcuro madidam eduxit. Pilofa erant genitalia. Quum ex mulierculis quæ tum in templo laboribus occupabantur, forte una ex genitalibus pilos avulfiffet, tamdiu infaniit, donec iubente Confeffionario pilis reftitutis fanam mentem reciperet. Stupæ quibus vulva obducebatur, integræ vifebantur. Dextram mammam aperuit Chirurgus idem, digitoq; in vulnus immiffa carnem glandulofam, candidam & humidam invenit planè incorruptam, fine ullo fæore.

VI. Præcipuum ufum fibi Medicina vendicat. Quia afphalto condiebantur Mumiaæ Egyptiacæ, cæterisq; aromatis, unde præcipuo munere ad Rem Medicam protractæ. Pleni de his funt Medicorum libri, ut hinc commodè exulare poffint. Ad *pigmenta medicinalia* hæc peregrinitatis merces ufui effe hominibus indicat *Tertullianus* l. 1. de Idolol. c. 11. Ubi pigmenta quid fint, fine nomenclatore patet, de quibus tamen videndum *Cl. Rhodii* noſtri Lexicon Scribonianum. Medicinalia enim erant, & hujus ſenſus cadavera, *medicata* dicebantur antiquis. VII. Ad morborum ſedes affectas & cauſas inquirendas

rendas evisceratio ista pro conditurâ condu-
cit, quæ alioquin in Magnatibus haud inno-
tescerent, sine hoc pollincturæ prætextu.
Eo fine Historias Vitasq; Principum Viro-
rum Medicus evolvere debet, ut de morbo-
rum mortisq; causâ ex cadaverum inspectio-
ne reddatur certior. VIII, Anatomicis de-
monstrationibus destinavit Mumias suas No-
bilissimus *Bilsius* præclaro invento & institu-
to. Hinc non farctas asphalto aut aliis aro-
matis, sed arte visceribus vasisq; separatis &
suo loco relictis, externa internaq; corporis
elegantè, ut ferunt, contra putredinem ca-
daverosam munit, ut Anatomicis postea de-
monstrationibus quocunq; tempore inservi-
ant. Maeste Bilsii generoso conatu. Serio
acclamamus cum *Persio* Sat. I:

nunc non cinis ille poetæ

Felix? non levior cippus nunc imprimit
ossa?

Laudant convivæ. nunc non è manibus illis,

Nunc non è tumulo, fortunataq; favilla

Nascuntur violæ?

Pretiosa tamen nimis est ista Anatomie,
ut omnium Prosectorum stipendia superet.
Præterea difficulter inducor ut credam, in
istis Mumias Bilsianis non tyronibus tantum,

un

uti nartas, sed & mihi meisq; similibus, monstrari posse vias & meatus, per quos chylus cum recurrente sanguine in hepar usq; perveniat. Magnus erit Apollo, si id vel tyronibus artis ad oculum ostenderit in cadavere recenti & manu haud violenta dissecto. In Mumiis exsiccatis vias vi forsitan audacior manus patefaciet. Et valvulae omnes exsiccatae contrahuntur, ut liquores sine impedimento hinc inde fluere concedant, etiam invitâ in viventibus naturâ. De Lymphaticorum verò progressu & ambagibus non repetam quæ alibi in contrarium fuere allata. Non ideo tamen exhibilamus Mumias Bilsianas, quibus memoriae tyronum fugienti quovis tempore succurritur, velut pictis figuris. Optandum potius ut naturam faventem humanitate sibi conservaret, dubitantes æquo ferret animo, nec Anatomiae benè meritos Doctores insectaretur acerbius. Cedro dignissima sunt experimenta, quibus putredinem corporibus arcet, & sanguinem cohibet. Parcat tamen viventibus & Dei munere spirantibus, ne, quod de Cedro Plinius l. 24. c. 5. nos de Bilsio dicamus: *Defuncta corpora incorrupta ævis servat, viventia corrumpit: mira differentia, cum vitam aufert*

rat spirantibus, defunctis pro vita sit. Rectius posteritati consuleret & publico, cui bono natus est, si suppressis invidendi causis, pol-
 lincturæ suæ modum ediffereret, si sangvi-
 nis repagula indicaret, si dubitantes in Na-
 turæ secum secreta abduceret, si deniq; er-
 rantes placidè in viam reduceret. Ita certè
 sibi maiorem famam, publico commodum
 procuraret. Veteres alœe, myrrha, cassia,
 cedria, asphalto &c. medicabant funera ex-
 siccanda. Sale communi idem præstiterunt
 Ægyptii, teste *Herodoto* l. 2. nostriq; Dani
 apud *Saxonem Grammaticum*. Sal mirabile
 suum deprædicat celeberrimus Chymicus
Jo. Rudolph. Glauberus part. 2. Mirac. Mund.
 c. de Us. Sal. mir. in Med. n. 20. 21. 22. præ-
 servare non solum insecta, sed integra cor-
 pora hominum & animalium ab omni cor-
 ruptione, etiam in forma siccâ, condire vi-
 vos mortuosq; pisces & carnes, ut & flores,
 ne putrescant: in Anatomia cadaverum
 conservare partes, ne fæteant, aut corrugen-
 tur. Vel Sal hoc quod forsan est vitriolatum,
 à *Glaubero* accepit *Bilsius*, vel ab hoc ille,
 adeò similes effectus admiramur, quod de
 sanguinis coagulatione quoq; ex eodem su-
 pra monuimus. Curiosi, quibus id conces-
 sum,

sum, experiantur Glauberiani salis vires, & forsan cristas suas demittet cliens tuus, tenax secretorum suorum custos. Evangelus apud *Macrobius* l. 7. Saturn. c. 16. ad integram carnis aprinæ incolumitatem conservandam sine putredine, infixum cuicunque parti corporis acutum æneum commendat. Stipticæ vi id attribuit *Macrobius*, quæ & oculis profit illorum qui in metallo æris morantur, & vulnera quæ ex æreo muerone fiunt secundum *Aristotelem*, facilius curet. In vitriolo autem Veneris potior causa, quod non tantum putredinem arcet, sed & oculis confert, & vulnera in pulvere Sympathico, de quo *Papinius*, citissime sanat. Quodcumque sit putredinis remedium, naturam feliciter imitatur *Bilfus*, quæ & integra corpora subinde indurat ut secula ferant, sicut superius evicimus, & particulas visceraque interiora conservat. Cerebrum quod aliàs *Ægyptii* eruebant, teste *Herodoto*, & alii postea pollinctores, integrum non ita pridem Avenione post multos annos molle humens ac tabis expers insito principio vel soli natura repertum, prodidit *Raynaudus* de Cad. Incorr. c. 6. n. 21. & similia narrat *Fabricius Hildanus* Cent. 5. Obs. Chir. 4. Jecur vetu-

statis patiens dicitur *Plinio* l. 11. c. 32. & *centenis durare annis, obsidionum exempla prodidere.* Ab anno elixatum hepar humanum, quod sub scamnis scholæ Medicæ asservatum fuerat, nullo modo corruptum aut rancidum, sed eo odore præditum, qui est in recenter elixato, vidit *Riolanus* l. 2. *Anthrop.* c. 21. De corde nihil addo, quod ob compactam substantiam nullo negotio conservatur. In aere exsiccabat Empiricus noster rusticus, ex quo deinde pro febrientibus pulverem abrasit. Nec reliquas partes tangam, quæ artis & naturæ beneficio, putredini subducuntur. In stupenda præparatione cadaverum, id subit mirari, quod narres habere Bilsium mumias, quibus nervi, alias quibus venæ, alias quibus arteriæ insint. Cur tantis sistendi sanguinis arcanis & manu promptâ instructus, hæc omnia in uno subiecto non repræsentat? Penes nos operâ & beneficio Consobrini nostri desideratissimi *D. Henrici Fuires*, in Musæo Academico asservantur quatuor Tabulæ, venarum, arteriarum, & Nervorum, ex uno cadavere humano cum *D. Leoniceno*, Magni *Veslingii* Equitis S. Sepulchri succenturiato, me præsentante Patavii exsectorum. Cæterum quod
de

de exsequiis Hepatis & Epitaphio illi mea manu erecto objicis, repetitâ refutatione non indiget. Nihil enim antea indictum vel pro hepate defendendo, vel ad me debellandum protulisti, stantq; immota illa quæ aliàs nobis & Natura monstravit, & ingenium suggessit. Experimento verò Bilisiano tantum credis inesse pondus, ut solâ unius canis demonstratione, sine alio ad dubia nostra in Spicilegio copiosius proposita responso, hepar vindicare possit & ad vitam revocare. Sed siste gradum. In canibus vestris non potes monstrare chylum ad hepar ire, aut in meseraicis contineri, nisi solâ conjecturâ, quia diverso colore sanguis ille videtur, quem colorem fallere ex Spicilegio nostro disces. Ex coagulatione cito sanguinis meseraici, malè chylus creditur, sicut ibidem monui. His aliisq; mediis non resuscitabis vestrum hepar, nec pristinæ dignitati restitues. De altera chyli via ad cor, *Pecqueti* invento, quam ad alium usum Nobilissimus *Bilsius* reservat, aliòq; derivat, ne verbum addo, partim quod de ea egerim in *Spicilegio*, partim quod novam istius distributionem nemo ex amicis meis viderit, qui ea de re me certio-rem faceret. Pro salvando Hepate nuper

P. Vattier Doctor Parisiensis in libell. *le Cocur Dethroné*, p. 37. chylum subtiliorem ex ventriculi tunicis statim ad hepar transfudare valde frigide demonstravit, qui ex *Historia nostra de Lacteis Thoracicis* refelli posset, nisi pro ingenii ejus lusu æstimarem. Ego verò cum Theologis, quos mecum committis, facile in gratiam redibo. Pressi vestigia vestra, & seria jocis vestris immiscui. Non credo me peccasse, si à jocorum nostrorum simplicitate malignus interpret absit. Magnus *Hugo Grotius*, Dæmonium illud hominis, lectus Tibi non videtur, alioqui rectius & de illius & mea mente judicasses, & quo fine ex *Platone*, *Heraclide*, *Herodoto*, *Plutarcho* illorum exempla in Notis suis congefserit, qui olim revixisse dicuntur. Demortui, sed in animis omnium viventis cineres veneror, cujus superstitis favore usus sum. Aliter si animatus essem, impudentiæ notam haud effugerem. Egregiam verò laudem & spolia ampla retulisti, quod etiam *Riolani* umbram contra me & manes evocaveris, quasi timore ullo me unquam subduxerim quamdiu in vivis fuit Magnus Riolanus. Scias verò, si quidem hospitem Te video in his quæ prius scire debueras, quam iniquo cala-

calamo atramentum nobis aspergeres, super-
 stite adhuc & inter vivos vegetosq; merente
Riolano, me masculo & intrepido animo
 partes meas à *Riolano* provocatum,
 publicè egisse, non tantum in *Ana-*
tome Reformata, sed in *Defensionibus* Lacteo-
 rum & Lymphaticorum Vasorum, spisso vo-
 lumine, & *Spicilegio primo*. Quæ omnia à
 me scripta, ante vidit, tradente Cl. *Patino*,
 utriusq; amico, legitq; *Riolanus* plusculis an-
 nis, quam fatis concederet. Post illius ex-
 cessum, parcissimè, nec sine magna venera-
 tione, ne manes defuncti turbarentur, ad
 testimonium advocavi dissentientes senis &
 meriti sententias. Cum larvis luctari, meum
 non est, nec ex usu erit, quia inter vespillo-
 nes versor. *Bilsius* autem an felicior *Riolano*,
 vespillo sit futurus, probabit eventus. Festi-
 vissimè facetus *Martialis* L. I. Epigr. 48.

Nuper erat Medicus, nunc est vespillo Di-
 aulus;

Quod vespillo fecit, fecerat & Medicus.

Crudelior *Bilsius* est, quia mortuos ef-
 fodere, & vivos sepelire conatur. Di tantum
 avertant facinus, tantamq; inter homines
 pestilentiam. Pro vivis intercedendum est
 supplicationibus, & inaudita strages depre-

canda. Ideone mihi sepulchrum à vespillo-
 ne Bilfio foditur, quod manus oculatas ha-
 beam crediturus quod viderim? Proxima ad
 scientiam via est dubitatio. Insigni impie-
 tate & crudelitate notas Nobilem *Bilfium*, ca-
 ve ne malam illius gratiam incas, quasi du-
 bitantes non ferret. Monitum est Senecæ E-
 pist. 94: *quæcunq; salutaria sunt sæpe agitari de-
 bent, sæpe versari*. Et si orco tradendi omnes
 essent, qui diligenter cibos masticant, ante-
 quam deglutiant, jam & brevis meliorum
 foret ætas & nutritio depravata. Si eadem
 & illi tecum est mens, audi oraculum *Psalm.*
*57. Foderunt ante faciem meam foveam, & ipsi
 inciderunt in illam*. Tandem Hepatis in gra-
 tiam, confugis ad veterum auctoritatem,
 tanquam ad triarios. Totiens verò alibi hoc
 argumentum pertractavi, ut nauseam excitet
 crambe repetita. Quod si axiomatibus Dia-
 lecticorum *Bilfium* tuum submittis, scias *Pri-
 mò*, pro corde majorem esse auctoritatem,
 & antiquiores testes. *Deindè*, nullos testes,
 etiam ex ultima antiquitate eductos, satis esse
 idoneos, qui veritati & experientiæ oppo-
 nantur. *Tertiò*, publicam confessionem re-
 bus venerationem conciliare, neutiquam ve-
 ritatem. Nec parit multitudo errantium,
 errori

